

吾

學

編

皇明名臣記第二十卷

吾學編第四十一

海鹽鄭曉

尚書王文忠公

公名英字時彥金谿人永樂二年進士庶吉士入翰林未幾召公及王直入內閣書機宜奏疏五年授修撰扈上北巡十四年進侍講二十年從征胡至闊樂兒海旋師至威虜命碎李陵臺駟令碑沉河中絕虜爭上顧公喜曰秀才二十八人中讀書者朕需爾爲用宜宣力勿憚勞公因言虜遁幸勿入險窮追 上笑曰朕爲天下國家計秀才

直不欲黷武耳又曰凡軍中一切動靜或謠言有聞即密奏朕又顧內臣曰秀才有事見朕勿闌駐安平鎮軍中有怨言上怒公言此皆壯士幸宥其過稍與恩澤異日得其死力上喜立命兵部尚書李慶給餉及輜畜二十二年上崩榆木川東宮命公與諸大臣定喪禮議國事宿內閣凡七日東宮即位陞侍講學士又陞右春坊大學士兼故官支兼俸明年乞省歸朝景陵召入便殿謂曰洪武中學士有朱濂吳沉朱善劉三吾永樂初解縉胡廣皆有名汝英慎自勉五年陞少詹事兼侍

學士七年内艱起復裕陵即位充史館總裁講
官陞禮部左侍郎兼侍講學士正統八年出理部
事領日講十一年引年不允十三年陞尚書南京
禮部景泰元年卒謚文安改謚文忠公與修 文
仁 宣 三朝實錄文章典瞻尤善草書寬弘采
易豪俊豁達不屑曲檢顧直諒好規人過以直三
楊皆不喜

太子少保周文安公

公名洪謨字堯弼長寧人正統十年進士祖父皆
備官有學行公少有奇質歷官翰林宮坊專心閑

學爲文詞簡直有理致不爲奇澁語而言意宛轉
可愛允熟國家典故議論建白緣飭吏事應對賓
客出入經史初在翰林即勸裕陵勤經筵以明聖
學謹內治以敦政本未幾上時政十二事條蜀寇
防禦便宜成化初爲祭酒兩國子表率生徒規閑
整整又上言祀禮儲蓄省刑減役薄稅禦虜撫夷
寺十事我朝尊崇孔子冕服循前代用天子制而
恒樂不稱封號不加公以爲闕典宜更議下禮部
尚書不可茂陵川公議增邊豆十二舞八佾十
四年陞禮部右侍郎尋轉左十六年陞尚書二十

三年加太子少保公又言書蔡氏傳璿璣玉衡非
是以故占步不合乞更定西番烏思藏者合諸族
入貢徵賞踰舊額歲益至三四人河西諸番又
詭烏思藏族益不可詰公請視海中倭夷給與符
二十道每貢書貢使名及貢物符上識以舊賜金
印至關驗是納否斥去成化末月當食不食衆議
宜賀公言陰盛故不可賀竟不賀弘治元年致仕
歸聞有虜警力疾上安中國禦四夷十事又三年
卒謚文安

太常卿張公

公名元禎字是祥南昌人天順四年進士選庶吉士翰林爲編修言選給事中不必論軀幹惟其器識遠大學問談博文章優贍耳諸給事中惡公言竟格不行茂陵即位上疏勸行三年喪又言治道大本原在講學聽治用人厚風化行此四者則庶政畢舉未幾與時宰議不合請告歸家居二十餘年益潛心理學名益高廷臣交薦弘治初召修

憲宗實錄進左贊善上疏勸行王道反覆幾萬言錄成陞侍講學士去南京乞歸養母家居者又九年修大明會典交薦召爲副總裁陞翰林學士

太陵知公名特聽公講說喜毋服闋又交薦
是南京太常卿修通鑑纂要又召爲副總裁改太
常卿兼翰林學士日講又侍東宮講讀未幾掌詹
事府管內閣誥勅疏勸經筵講太極圖及西銘諸
理書東宮講孝經小學上忻然嘉納亟索太
極圖觀曰天生斯人以開朕也且將大用竟不果
公貌癯然纖弱勤學好問力探經傳廣隱多所獨
討論議揭揭崖岸孤貞剛果之氣不可屈好面折
人過交陳選羅倫陳獻章皆以道學相規切

太子太保林文安公

公名瀚字亨大閩人成化二年進士爲翰林編修
歷陞諭德弘治三年爲祭酒上疏請開科進人才
人畧謂今天下學校作養日盛科貢二途取有定
數歲有常規不無遺材淹滯之歎詔開貢公祭酒
卅十年待諸士嚴而有恩請託不行故事祭酒膳
儀銀歲百數公悉貯官購祭酒公署及監中諸師
恤寓舍九年進禮部侍郎掌監事十二年入吏部
爲侍郎明年爲南吏部尚書會災異率群僚陳十
一事曰明黜陟去冗官清吏弊定庄田折鹽鈔處
監生嚴軍政省供應收才望禁奸貪停不急寬民

力時有御史自巡按逮獄二三儒生黃緣傳奉授
中書舍人上疏申救御史乞寬宥全風憲之職收
回中書舍人成命杜倖進之門則天命天討自協
至公忤 旨自効不報十七年復疏重根本以回
天變四事曰保固南京以重 祖宗之根本佑啓
皇儲以重天下之根本撫綏百姓以重邦家之根
本增進賢才以重政治之根本明年甲子適符洪
武十七年 聖祖開科取士之期宜加增鄉試解
額以廣賢路是年請老疏云臣在南京親見諸尚
書翟瑄董越謝綬王繼陳道乞休不允三年間相

繼物故亦不允正德元年彖宰缺給事中丘俊御
史石珍薦公學優才膽剛方黃介朱熹敗南京兵
部尚書叅贊機務因災異會陳十二事曰隆大孝
以先天下言先帝奄忽上賓 陛下親承付託惟
任大臣而不改先帝所倚用立大政而不易 先
帝所貽謀斥遠近習力體 先帝親賢遠佞不假
貴戚力行 先帝割私任公戒飭邊備常若 先
帝不忘夷虜節省財費常若 先帝不忘生靈事
無巨細無內外惟倣 先帝所已行者而力行之
則大孝之實通于天下矣其次集群議以決大政

改州治以奉陵寢崇儉德以裕財用省虛費以甦
軍民增貢舉以進人才修武備以禦寇盜省匠役
以甦民困節工役以省財用清吏役以革宿弊清
馬政以防欺蔽大優容以廣言路剴切無忌諱是
時逆瑾側目方正士會南京科道官言事被逮公
獨往送贐俸金且議上章直諸言官瑾聞之恨勒
科道招詞逮公爲黨矯詔降浙江左叅政致仕瑾
恨未已復矯詔詰公與大學士劉謝尚書韓文等
爲奸黨瑾誅復向書致仕按察副使陳伯獻嘗稱
公賤者即之不知其爲貴卑者即之不知其爲尊

愚不肖者即之不知其爲賢且智獨非意相干者
即之始知其凜然不可犯也卒年八十六贈太子
太保謚文安子庭弼嘉靖中爲工部尚書謚康懿
庭弼弟庭機官南京禮部尚書庭機子爌今爲翰
林學士吏部侍郎爌弟煙舉進士父子兄弟皆以
文行知名一時海內冠冕推林氏云

尚書王文莊公

公名鴻儒字懋學南陽人成化二十三年進士公
聰悟天成書過目成誦作字端勁有古法里人有
爲府史者嘗致公佐書府中知府段堅見公書顧

奇史史對曰史里人王生書也堅即召見曰子風
神清徹豈塵埃中人即留讀書府中續食授衣遣
入郡學爲諸生提學副使陳選異其文曰此高才
生文章經世者非直舉業未幾發解河南第一筮
仕南京戶部出納倉庾榷舟督稅皆有條式便公
私聲蹟遂著衆益占其爲全才弘治九年僉事提
學山西十五年進副使提學在晉九載教人以溼
養爲本文藝爲末正已率人簡約條束生徒請益
因材開發竟日不倦教之不率至再三益懇惻得
改悟輒喜士以故益信嚮泰陵勵治思賢嘗召見

華容論人材曰藩臬中如王鴻儒他日可大用正德改元乞致仕賜告四年家拜國子祭酒不數月憂去七年又家拜南戶部侍郎十年召入吏部歷左右侍郎嘗曰惟誠與直能濟國事趨名者亦趨利於社稷生民無益也時吏部尚書陸完有才名顧與宸濠通語言公亟稱夏忠靖王忠肅二公賢可師法感動完完意不說十四年三月陞公南戶部尚書是歲六月宸濠反完敗公出督餉留都至九江聞變遡流欲入武昌約守臣起兵討賊又聞康陵南巡益憤懣疽發背卒謚文莊公博聞多識

學有體要宏裕與衍交發互溢尤明習國家故事
凡祖宗設政任人及先哲立朝行已歷歷能言
皆有按據至論時務要決成敗可否通窒援証今
古如探囊指掌待物開誠和而有禮不問人私人
亦不敢以私問也段太守蘭州人治南陽脫畧簿
書宣導化理公及舉人張景純皆太守所識拔弟
鴻漸亦舉河南鄉試第一官至山東右布政使致
仕廉靖有吏才

太子少保傅文毅公

公名珪字邦瑞清苑人成化二十三年進士庶吉

士授編修弘治十三年陞左中允正德四年逆瑾
惡翰林不附已矯旨大明會典文訛外奪預修
者官公降修撰瑾敗復中允五年以學士陞吏部
右侍郎明年轉左尋陞禮部尚書當是時康陵好
佛自稱大慶法王外廷顧聞之無徵以諫俄內批
禮部番僧請腴田千畝爲大慶法王下院乃書大
慶法王與聖旨等公佯不知者執奏孰爲大慶
法王者敢竝至尊書褻天子壞祖宗法大
不敬詔勿問田亦竟止寵伶臧賢請改牙牌公曰
優敢亂祖宗法臧又欲改敎坊司印公曰優敢

亂 祖宗法皆格不行時流賊亂中原太監陸門
總軍容征久不捷諸內臣又立監鎗名益出後曹
內臣統軍下廷議衆莫敢先發公奮曰兵老民疲
賊日熾以冒功者冗債事者漏罰失將士心今賊
在郊圻肺腑間民囂然思亂禍在 宗社旦夕吾
輩死不贖責諸公尚首鼠耶議罷疏上竟遣監鎗
諸內臣俄有旨令公請致仕公即請致仕去杜門
謝客及卒遺命無請塋祭嘉靖元年理守正文臣
贈太子少保謚文毅公朴端簡諒自檢甚嚴孝友
之行孚於鄉曲

少保毛文簡公

公名澄字憲清崑山人弘治六年進士第一人方正端毅有濟務才初授修撰預修大明會典陞右諭德克東宮講讀官又預修通鑑纂要進右庶子兼侍讀賜金緋康陵即位預修孝宗實錄瑾矯奪官仍侍讀尋以待講學士日講正德十二年爲禮部尚書公在部持正守典禮不與諸貴倖通存謝恭默靖慎諸貴倖亦不恨公康陵崩奉昭聖皇太后旨偕大學士梁儲駙馬都尉崔元壽寧侯張鶴齡韋太監邵皇親迎皇帝興邸以功

勅廕子一人世錦衣指揮同知辭充總副裁修

武宗實錄未幾大禮議起公守濮議請以益王子
崇仁王子後 獻皇帝上不從 章聖太后至
請由大明左門入又不從會議所生不得稱父母
即不得帝后其所生又不從 上不喜或勸公將
順者霍韜再移書公論今日主濮議非是公不從
嘉靖二年三月病請致仕加太子太傅令屬吏護
行至興濟卒贈少保謚文簡公心術平夷學識淳
正狀貌抑抑謙恭至是非義利禍福確乎不可拔
也

論曰余釋褐時文簡公知貢舉國士遇我也公清
修雅量顧宏達無枝柱然有定執不曲徇人大禮
議起公最先去當是時內閣楊廷和蔣冕毛紀費
宏五部尚書喬宇孫文彭澤林俊趙璜詹事尚書
石琚吏部侍郎汪俊何孟春云文忠與抑庵齊名
稱東西王皆阻於廬陵不得入內閣東王久秉銓
柄公竟置散地商文毅公不能薦周文安乃萬安
劉吉皆得入內閣張公家居時人爭薦東白名儒
碩輔比起又交章醜詆諺曰毀譽無常朝玄暮黃
信然林文安傳文毅二公皆守正抗奸佞風節稜

稜文莊在外僚遂受和秦陵皆不究其用

皇明名臣記第二十卷終

子履淮校正

皇明名臣記第二十一卷

吾學編第四十二

海鹽鄭曉

太子少保李襄敏公

公名秉字執中曹州人正統元年進士爲監察御史才識宏博議論持正已負公輔之望景泰二年宣府總餉侍郎劉璉巡撫都御史任寧罷公以僉都御史總督邊儲叅贊軍務勅退柴溝堡都督董斌又盡更置諸不才將校三年秋瓦剌入貢上言迤北使臣納哈赤等三千人馬駝畜四萬餘匹除進貢外存養宣府日支草料宣府草不過二十萬

束料二萬石我兵尚不給何以供虜使且永樂宣
德間虜使進馬官驗不堪者令虜草地牧放不許
入境住劄窺伺正統間許住牧大同以故深知地
利數犯邊今虜使畜多譎詐之計不可不防是年
冬兼巡撫尋改提督軍務公遂薦葉盛叅贊獨石
諸城軍務勅總兵紀廣副總兵楊能 上曰塞圍
方棘不得以細故掊大將下巡按御史覈報廣亦
訴公專權召公還京以右通政蔣琳爲僉都御史
代公言官交章請畱公 上爲且畱琳遣言官即
前改琳貴州鎮守督軍務巡撫公畱宣府四年掩

上木鶴兒嶺戰沒遺骸萬五千請下大同紫荆諸
壘並掩凡十數畝是秋病乞代不許許公一子視
疾其在遼東巡撫皆能節用愛人恩威兼濟吏民
畏服又能識拔將校斥遠烽火塞上無大寇深入
即小入輒先覺驅出塞即已以故邊民得休息軍
無冗費虜亦知公名輒徙帳避去成化二年董山
誘海西寇遼東公及武靖伯討降山逮山至廣寧
誅之徙其黨廣西加太子少保還臺四年入吏部
代鹽山爲尚書請寄不得行五年春致仕先是公
與王敏並以剛方負時望坐廢再起巡撫公遼東

王陝西未行取淮揚總督給事中張寧薦公爲兵部尚書王左都御史葉盛入閣時葉自廣東入議事御史呂洪言公尤可薦葉聲名損於嶺南不可薦薦公及王竑上用王兵部公都察院葉亦改宣府未幾公入吏部公在吏部時崔升爲侍郎不相能適巡檢事爲考功郎中張寰所持康御史又以星變合諸言官乞汰京官且劾戶禮兵部尚書馬昂姚夔程信學士商輅康御史者本與公善諸大臣益忌公公請會臺官考察京官大臣被劾聽自陳上留姚程商三公馬罷去又有戴御史者請

方面官復如正統間例聽在京三品以上大臣薦
舉語侵吏部劉御史又言薦舉開競門不可是年
朝覲斥退者衆又多大臣姻黨兩侍郎時時短公
蕭給事中遂劾公下廷議兩侍郎唯唯曰吾二人
嘗言之奈不肯聽何公遂致仕與來朝被斥官同
辭竟快諸讒忌者蕭給事中又爲山西布政使丘
陔許逮詔獄諸言官又疏言王桀欲入吏部彭時
爲之內主以故逐秉彭不自安稱病商欲弭群口
請用崔侍郎吏部尹轉左葉陞右侍郎代尹康劉
二御史蕭給事中並請官公家居言官屢薦大臣

忌其方艷竟不起謚褒敏

太子少保崔莊敏公

公名恭字克讓廣宗人正統元年進士爲戶部主事有能譽出督延綏邊儲南陽薦知萊州府府庫故歲入漕海布數萬輒浥爛破庫人家公請量畱漕海布餘並出爲軍餉不踰年布盡歸守庫者八百家十三年萊大旱蝗捕蝗發賑乞免下邑逋租又善辨疑獄人稱神明明年虜犯京師集兵數千遣官部署勤王在萊六年吏畏民懷景泰三年陞湖廣右布政使盡革諸冗費及和市苗賊侵武岡

督餉訓民兵勦賊賊皆聽撫公安劍利流民相殺
公曰勿急急且大變下令流民願附籍者聽否且
俟秋成遣歸衆遂定調左江西囊中惟律比圖書
衣數囊省有廣濟庫者庫官吏乾沒五十萬公發
其奸贓行臺韓雍竟法連坐布政使失職郡邑肅
然制爲役法調輕重任一歲之勞得九年之逸天
順二年陞右副都御史巡撫蘇松諸郡所至進耆
老詢利害爲興革會都督徐恭請浚儀真漕河公
役夫六萬人程工賸廉民不告勞又浚常鎮河避
江險四年鹽山蘆爲吏部左侍郎成化五年代李

秉爲尚書不久罷歸九年起爲南京吏部尚書卒
贈太子少保謚莊敏公寬平坦易中無芥蒂好善
惡惡出於天性臨事剛而不亢柔而不褻其在吏
部慎惜人材獎拔後進廉靖自居人知嚴憚

少保姚文敏公

公名夔字大章桐廬人正統七年進士明年爲吏
科給事中條上時務八事內艱闋復入科會虜變
累疏言禦虜方略 景帝監國議即真公預議有
力景泰元年超陞南京刑部侍郎三年改南禮部
勅考察雲南諸吏四年還朝請禮部 上不豫辭

涸涸禮官方具議 上皇已復辟調南刑部未
幾召還禮部天順二年南陽薦改吏部代孫弘佐
鹽山七年代石琚爲尚書禮部 上顧公儀度又
奏對都雅喜茂陵即位率群臣上思艱難戒逸欲
重名節數事成化四年疏請謹小星葛藟之分以
兆百男之慶 睿皇后崩議合葬禮又議祔廟禮
上以孝肅太后故輒報聞公疏言 先帝治命
錢后與我合葬書內閣無忘朕言此綱常大事臣
等不忍誤朝廷又率百官伏文華殿門哭諫 上
頓首再三請太后竟從百官議太陵嘗見公及彭

時疏謂劉健曰先朝大臣忠厚爲國如此五年李秉去商輅欲薦公彭時欲薦王舉而尹旻又欲得尚書相持久之乃以崔恭爲尚書是年六月公代崔七年滿九載加太子少保是時屢有災變公力陳荐遭侵異禍亂將起疚心危論冀上感悟因乞歸不許未幾卒贈少保謚文敏公資儀山立議論河懸雄才偉度遇事立斷獎誘後進振拔淹流意所交識不避親故成化初公言少保黃福得謚忠宣土木死事大臣尚書王佐鄺埜雖贈少保未得易名佐操存正大經畧弘遠埜心術端介處事

嚴恪沒於王事乞謚如福例制曰可謚佐忠簡塋
忠肅

太保尹恭簡公

公名旻字同仁歷城人正統十三年進士入翰林
爲庶吉士景泰間歷戶吏科給事中天順初遷通
政司參議六年督餉陝西成化二年陞吏部右侍
郎五年轉左歷佐王李崔姚四公九年代姚公尚
書累進太子少保太子太保太子太傅二十二年
致仕弘治十六年卒贈太保謚恭簡公選法通敏
賢愚皆說竟爲津要人所惡中傷去

論曰九臬執中相繼在吏部南人不喜謂二公右
北人也時內閣南人爲政各欲用南人吏部以故
執中僅一年去北人紛然詆南黨善傾人內閣不
得已乃用克讓南人又不喜克讓數月去而大章
入吏部出入五年北人爲之語曰斬却姚夔頭去
祭王顯墓同仁代大章凡十二年内閣又指同仁
爲北黨巧中傷敗其名父子奪官去甚矣銓曹之
難任也

皇明名臣記第二十二卷

吾學編第四十三

海鹽鄭曉

太子少保彭惠安公

公名韶字鳳儀莆田人天順元年進士爲郎刑部
時張岐以壽寧侯兄從外臺躡食都御史入院公
疏岐不可用乞召故尚書王竑李秉侍郎葉盛下
詔獄給事中毛弘等論救得釋尋郎中廣東司司
隸輦轂間事多涉貴近豪戚脅挾撓沮公屹然持
正不吐茹外戚家冒賜額奪民田勅公即按頃畝
公至真定繞田周視徑歸上疏自劾曰昔田文令

馮驥收責于薛驥顧折券矯賜薛人今真定田
祖宗來許民開種即爲恒產不復增科以勸力農
往年韓太監廣寧侯屢奏虐民賴先皇明聖民
間稍得安業乃今周或又復強詞餘奏傷民病國
臣誠不忍履畝奪小民衣食尺寸地附益貴戚又
逮下詔獄言官交論得釋他日有貴戚請荒田者
上怒顧左右曰周或爲彭韶所持令朕負朝論柰
何又請當是時何喬新與公同官刑部有經術練
吏事純懿貞方並負重望成化六年陞公副使按
察四川劉氏扈氏曾氏殺人獄疑久莫能決公至

立斷進按察使請王府葬祭修道內臣及行人又
勅雲南太監錢能冒貢珍奇擾驛遍十四年爲廣
東布政使薦陳獻章勅鎮守太監顧恒非禮貢獻
又勅市舶太監韋眷矯稱進奉私庇富豪輒亂舊
章妄開新法民間力役更無曠丁籍上均徭豈有
餘戶又勅珠池監丞黃福採捕禽鳥騷動雷廉又
勅錦衣鎮撫梁海本廣州人往來傳道輒稱貢儀
水陸舟車飲食帳幃百方橫索所過蕭條海者太
監芳第芳見疏大怒且中傷公會公應詔陳言條
上漸不見終四事害內臣貢獻皇妃加於嬪后

陛下褒賞其家與先帝后家等一也內臣日增數至萬計利源兵柄盡付其手作奸犯科一切不問二也四方貢物通番航海科擾百姓驚動四夷三也六卿大臣並加師保諸寺監卿無領高官及其休去月廩歲興徧施凡鄙四也上不喜芳輒從傍言公每事輒邀名方命左班相左右得大官益肆無忌上直視芳不應芳懼伏地調公貴州未幾吏部尹尚書屢薦公大臣器上故知公名二十年遂陞副都御史巡撫江南督糧儲公簡靖明法禁吏不敢犯明年召入爲大理卿未上又坐

論內外官貢獻道改副都御史巡撫順天泰陵即位交薦召侍郎刑部會浙江不靖勅公巡視劾罷不職守臣誅其渠魁事遂定戶部言鹽法沮壞即勅公理鹽法公繪煮海貧人晒淋熬負折閱朋儕之苦節爲八首以獻尋召入吏部爲侍郎弘治三年彗星見天津公上厚根本減役錢正近侍慎官爵四事又請午朝無循故奏細事四年尚書刑部安遠侯柳景總兵兩廣兩廣巡撫秦紘發其奸賊鉅萬景有挾欲破法且擠紘巡撫公竟抵景法覘其爵景賊入八百兩忽降獨旨公言景賊十未及

一即獨他日遂可管復爵位爵位既復遂可管求
征鎮公在部二年請致仕卒贈太子少保謚惠安
林俊嘗疏言韶謚不副行乞如葉盛吳訥魏驥等
謚不報公孝友溫恭廉明直諒寡慾清心始終無
玷儀狀歎然不啻寒士至法理所在義色昌詞人
不可奪所著有國朝名臣錄贊莆陽文獻志政志
文集百餘卷

尚書何文肅公

公名喬新字廷秀廣昌人景泰五年進士父文淵
進士嘗知温州府廉靖平恕郡中稱治召入刑部

爲侍郎請告歸正統中薦起吏部侍郎景泰中進
太子太保佐王直同爲尚書被劾乞致仕去公幼
敏穎有奇質讀書發難出人意表初主事南京禮
部歸葬父卜地不得吉會朱樞密陳文定公葬父
廣昌子孫貧欲粥其塋地衆謂此吉壤公曰暴人
父而葬吾父吾不忍爲刑部郎中孤介嚴冷持法
平即執是莫可撓奪爲按察副使福建擒豪強捕
海盜減礦課罷牛租控險設縣表儒賢政績高偉
不瑣屑簿書陞河南按察使諸貪殘吏倚強援莫
敢詰公盡錫墨坐法去撫輯南陽山谷流冗六萬

戶陞布政使湖廣會荆襄大水漂千家民饑公均賑平徭列九等授役成化十七年副都御史巡撫山西督三關兵事會山西又旱饑出倉粟賑糶三十萬石虜自河曲入塞急遣伏兵灰溝旁斬虜入敗去召入刑部左侍郎虜酋擁衆寇大同殺邊將紫荆居庸告急勅公巡邊遣謀覘虜營聲言遣兵搗其巢虜懼不戰遁去山西又饑人相食即命公賑贍得便宜行事公請內帑淮鹽銀及粥祠部僧道牒得粟數十萬石分部賑卹又飭饑人疏溝渠出粟償直凡活人三十萬播州宣慰使楊輝嬖妄

乃寵其子友欲奪嫡子愛諸小酉不肯從輝矯奪
大壩鎮軍諸夷寨立懷遠宣化二長官司又割播
州凱離五十二寨設安寧宣撫司立友爲使張都
御史輒爲輝畫請得旨會愛母死友母益橫專其
家結凶黨誣愛反交通唐王朝廷疑愛遣公即訊
友母子又輦金寶賂諸權貴人欲公囚愛待命衆
藉藉爲友遊說必欲去愛公至盡得友子母奸惡
罪條上白愛無反謀革友宣撫削官銷印遷保寧
興產業自給播州遂定陞南刑部尚書疏奪內臣
守備蘆洲還民恭陵初召公刑部爲尚書公執法

嚴教凡中外貴有力請寄一切不得行上疏乞禁
京師胡服胡語鄒御史者凶橫欲躡得大理丞公
薦曲阜魏紳郎中鄒御史恨公會公外氏與鄉人
訟即誣公得金錢與行賂輒下上其手要地人又
從中主之公杜門引咎辭位下諸根連人詔獄窮
治無踪跡公雖湧白竟不安其職請老去公卿臺
諫交薦起公竟不得起卒後江西巡撫林俊論公
文行政節應謚法得謚文肅公守官清慎律已方
整博學精法律敏於吏事事無難易夷險不避嫌
怨必行其志

太保周文端公

公名經字伯常天順四年進士父瑄字廷玉陽曲人宣德乙卯貢士初主事刑部歷陞南京刑部尚書致仕尚書寬大詳雅修髯長身善議論守官廉故鄉無田宅可歸寄家江陵卒謚莊懿贈太子少保公歷官翰林至春坊中允侍太陵東宮講文華大訓東宮每起立拱聽內閣言太子勞公宜晚請東宮坐聽公不從弘治二年侍郎禮部條奏皆傳經義改吏部靈壽人以大明川民田獻太監李廣戶部執議不得允公會諸司奏竟奪田歸民人

年諸大臣以災故上言屬公草疏請早視朝勤職
政節後費省遊幸止貢獻斥樂戲斥樂戲一事語
尤切直頗傳踪跡此疏出誰耿尚書曰疏名首吏
部裕寔具草公又曰疏草本出經即有罪罪經十
年陞戶部尚書凡諸王請河湖稅錢執不與中官
出南京織造者請長蘆鹽八千引粥兩淮准給中
官鹽銀二萬兩又執不與中官織造浙江者請諸
竹木稅又執不與上詔公言并停織造大同缺
戰馬鈞陽請出太倉銀市馬公曰糧馬各有司
祖訓六部不得相壓兵部輒侵戶部官非祖訓

上是公言更命太僕銀市馬給事中魯昂言國用
不足請盡括諸省稅役金錢輸太倉公曰國用不
足宜儉於國不宜沒於民織造賞賚齋醮土木費
益廣不節乃欲括天下財盡歸京師給事中言非
是中官傳旨取太倉銀三萬兩爲燈費公又執不
肯發內靈臺奏增洒掃卒當給月廩公再疏竟不
與修 清寧宮議調役山東七千人公曰山東歲
歉民貧民不可輒動請以戶部羨銀雇役壽寧侯
家有賜田河間數百頃詭賜額并得旁近民田又
千餘頃又乞畝加稅二分公曰河間地多沮洳歲

無常收項因久旱即耕退灘一遇淫雨遂成溝壑
苟指目前輒增畝稅貽累貧民轉爲流徙且王府
賜田畝稅二分外戚不宜獨優又聞茂陵妃家私
田與民田比一切還民壽寧家不宜獨異疏三四
上會雄縣有以退灘地獻爲東宮庄者上念
公言擲其奏抵罪十三年致仕康陵即位起南戶
部憂去正德三年又起禮部卒贈太保謚文端公
初在清散幾三十年編摩校閱有文章名及授政
務守正應變剴裁不滯屹然有古大臣風

太保劉忠宣公

公名大夏字時雍華容人天順八年進士爲庶吉
士出職方爲主事歷郎中時有獻取交南策者下
部索永樂中調兵食數甚急公匿其籍徐以利害
告尚書余肅敏公力沮得寢朝鮮使貢苦建州虜
遮道請改道由鴨綠江中官有朝鮮人爲地下部
議公曰朝鮮貢自鴨鵲關由遼陽經廣寧過前屯
入山海迂回四三大城戍此 祖宗微意若自鴨
綠江抵前屯山海路大徑恐貽他日憂不可從塞
有虜入尚書必問劉郎中云何劉郎中言輒行行
輒效出爲福建參政巡海海道兵久弛公至造哨

船葺倉計儲立收支法案設一館往來督察不半
年海道肅然陞廣東右布政使嘗過崖山弔大忠
祠朱慈元后陵泫然曰后與陸張二臣同死國今
大忠有祠而慈元不祀義弗稱謀立廟人感其義
不日而就轉左浙江弘治六年河決張秋擢右副
都御史治河不能塞再遣平江伯陳銳內臣李興
山東按察副使楊茂元疏乞召還銳興專任公及
抑損外戚以回天意茂元謫長沙同知公集山河
二省守臣上議曰河性湍悍張秋乃下流喉襟未
可輒治治于上流分導南行復築長隄禦橫波且

防大名山東之患候其循軌而後決可塞也遂踰
孫家渡河三十里四府營河十里築長堤起河南
胙城盡徐州經滑長垣東明曹單諸境長三百六
十里量能任功五旬而事竣十年虜入塞師行乏
軍興公以戶部侍郎出經畫或曰邊糧草半屬京
貴子弟此行剛且取禍公曰處天下事以理不以
勢定天下事在近不在遠俟至彼圖之至邊召問
父老得其要領一日榜通衢云某倉缺糧幾千石
每石給官銀若干凡境內外官員客商家願輸者
來自十石上草自百束上聽即中貴子弟不禁也

不兩月積蓄有餘蓋往時糴買法糧百千石草子
萬束方聽以故貴子弟爭相爲市轉買邊人糧草
續運牟利十五此法立有糧草家自得告輸貴子
弟即欲收糴無所得邊人言自劉侍郎收市法行
倉場有餘積私家有餘財十一年三章乞致仕賜
誥杜門修勵十三年家拜右都御史總督兩廣軍
務即攜二僮行兩廣人聞公來大喜公旌賢才斥
貪穢裁冗費更役法上下不便者一切更正十五
年陞兵部尚書時邊事急上以兵事屬內臣苗
達謀出兵掩虜上召公問力言不可上曰永

樂頻出塞破虜今何不可對曰 皇上聖武固同

符 太宗奈今兵將庸疲遠不逮昔當時淇國公

丘福稍違節制數萬甲兵一日陷虜今之將又在

福下不若且令各邊料敵戰守猶似得策 上曰

善一日召問天下衛所軍士何如對曰貧與民同

安能養其銳氣 上曰諸軍居有月糧出有行餉

何以故貧對曰江南困于運糧江北困于京操此

外派費猶有不能盡知者翌日即詔各衙門條上

軍民疾苦有造飛語帖宮門誣公者 上曰宮門

外人不能至必內臣忿不得私殺軍士耳修 清

寧宮旨下部役軍萬餘人公請減十五營工者請
上上令內臣語內閣擬旨詰責公洛陽曰惜軍力
兵部職近劉尚書輒以老辭朝廷下溫旨勉留尚
請未已若詰責彼將以不職固辭更於何處得知
此人用內臣以告上欣然如公議是年以災水
去不許因上十事皆兵食要務下諸司議興革
上嘗召諭曰事有不可每欲召卿議又以非卿
事而止後有當行罷者卿揭帖啓朕公對不敢
上問何也曰先朝李孜省可戒上曰卿與朕論
國事豈孜省比曰臣下以揭帖進朝廷以揭帖顯

行何異前代斜封墨勅 陛下宜遠法帝王近法
祖宗事之可否外付府部內咨內閣可也如用揭
帖上下俱有弊且非後世法臣不敢效順 上稱
善嘗召問天下何時太平朕幾時得如古帝王對
曰求治不宜太急凡用人行政即召內閣并執政
大臣面議行之但求順理即致太平 上曰劉健
嘗薦劉宇才堪大用朕觀宇小人內閣亦豈可盡
托 上嘗召問近日外議云何曰近有 旨釋李
夢陽中外僉呼 聖德如天地 上曰夢陽指斥
威嚇且語言狂妄朕不得已下詔獄比奏上朕試

問左右云何應曰付錦衣撻而釋之朕知此輩得
旨即重責致死以快中宮之怒使朕受殺直臣名
不忠如此朕以故釋復職刑部尚書閔珪讞大獄
忤 旨批答久不下公獨對 上因語及之對曰
人臣執法不過效忠 朝廷珪所爲無足異 上
曰且道自古何君何大臣亦當如此對曰臣幼讀
孟子見舜爲天子臯陶爲士瞽瞍殺人臯陶亦執
之而已似未可深責 上頷之明日允珪奏十七
年北邊缺總兵 上諭內臣語公用李李本外戚
所薦也內臣言大夏得傳帖尚執奏安肯聽奴口

語 上默然一日朝罷召公 上手一帖付公帖
書李名公退至部語同列曰此非將才豈可爲大
帥明日別推二人 上內批竟用李李去鎮無幾
効章至 上謂公曰悔不用卿所薦先是公應詔
陳言盡罷光祿無名供億歲百萬計又議革騰驤
四衛軍士內臣恨公 上召公密議又或及裁抑
內臣事一日 上召公入御榻前 上左右顧近
侍內臣退避去奏事畢復來對久欲起不能 上
命太監李榮掖公出榮且扶且請曰五品軍行事多
失老先生幸隱惡揚善公曰 聖上天性聰明某

於政事外未嘗取輕易毀譽人某今日力求退
上曰李榮每稱卿某於老太監踪跡遠何以得
此榮曰當朝大臣公名第一榮何敢蔽賢時戴公
爲左都御史 上有大政事每召公及戴公面議
十八年春二人對畢 上賜二人白金二錠諭曰
朕聞朝覲日文官避嫌有閉戶不與人接者卿二
人雖開門延客誰復以賂通乎以故賜卿二人又
曰勿朝謝公卿知之且懷愧懼 上崩公慟哭不
能起正德元年加太子太保致仕二年瑾專政劉
宇恨公恭陵時面對不爲宇地謂瑾曰籍劉尚書

家可得幾萬金瑾因潘尚書藩毛總兵銳獄詞有
公名三年夏矯制逮詔獄且欲殺公下廷議屠浦
曰檢律劉尚書無死罪謫戍肅州四年至河西買
墓地五年赦歸田八月瑾誅復官致仕公平生不
以勢位自居所至愛民如子民亦愛之如父母遇
事有當行未嘗先洩有疑未明者不以公移顯行
雖屬官亦具手簡直述其事紙尾書名以故所委
事無大小無不盡心力不相欺負功名富貴子孫
福澤泊如也嘗預作壽藏東山陽記曰予嘗見士
大夫家子弟愛世父兄者俟其身後必求名儒大

筆鏤張行業以誌于其墓作國史者東漸而來之
予無似承租宗世澤竊料甲官祿則後四十年在
家在邦無一事可述者萬一後人私所親謬言以
謾名筆縱可欺人獨不自愧于地下也耶用是述
平生履歷書而勒諸石付兒祖生等藏之以俟他
日其詞雖俚其事則核予心安焉公嘗口名官以
正已爲先所謂正已不特當戒利亦當遠名李東
陽曰東山乃昔人所謂與物無競臨事有爲者也
卒贈太保謚忠宣

太傅韓忠定公

公名文字貴道洪洞人母姪賣紫衣人言與爾文
潞公已而生子因名文成化二年進士爲給事中
工科劾都御史王越薦故吏兵尚書李秉王鏊語
頗涉兩宮越又附汪堅以故逮文華殿考訊幾死
出爲湖廣參議累官都御史侍郎南兵部尚書太
陵知公召爲尚書戶部時時召見公一日顧公長
嘆公頓首謝不職上曰朕欲理鹽法苦人撓沮
今邊儲日急奈何公又頓首謝出上疏請革七弊
一開中引鹽二興販私鹽三賤賣官鹽四買補殘
鹽五夾帶鹽六越境市鹽七轉運乏人上盡

行其言康陵初即位青宮舊內侍劉瑾等日導

上狗馬鷹兔舞唱角抵廢萬幾時號八虎公每朝
退輒泣恨不能救正屬吏李夢陽說公大臣義共
國休戚徒泣何益公曰計安出夢陽曰比言官章
入交劾諸內侍章下閣閣老持劾章甚力公誠及
此時率諸大臣死爭閣老又得諸大臣爭持劾章
必益堅去瑾輩易耳公持鬚昂肩毅然改容曰善
即事弗濟吾年足死不死不足以報國明日早朝
公密叩閣老閣老許之倡諸大臣諸大臣又皆應
曰諾公退具疏曰臣等待罪股肱值主少國疑

瞻前顧後心焉如割中夜起嘆臨食而泣者屢矣
近歲朝政日非秋來視朝漸晚仰觀 聖容日就
清癯皆言太監馬永成谷大用張永羅詳魏彬劉
瑾丘聚等置造巧僞淫蕩上心擊我走馬放鷹逐
犬或俳優雜劇錯陳於前至導萬乘與外人交易
狎昵媒賂無復禮體日遊不足夜以繼之勞耗精
神虧損志德遂喪天道失序地氣靡寧雷異星變
桃李秋華考厥占候咸非吉徵切緣此等細人惟
知蠱惑 君上以便已行私不思皇皇帝業在
陛下 一身今大婚雖畢儲嗣未建萬一起居失節

雖將此輩壅粉蕙醢何補於事昔我高皇帝艱
難百戰取有四海列聖繼承傳之先帝以至
陛下先帝臨崩顧命之語陛下所聞也奈何
姑息群小置之左右累聖德乎今馬永成等罪
惡既著若縱不治將來無所忌憚爲患非細伏望
奮剛斷割私愛上告兩宮下諭百僚將馬永成等
明正典刑以回天是世神人之憤潛消亂階以保
靈長之業疏入上
章等大懼王岳者
亦青宮舊內侍素剛勵頗
章不肯下關瑾等窘相對泣會諫
侍言官

上遣司禮監八人詣閣議一日三至閣益持議不肯下岳本八人中人顧獨曰閣議是明日忽召諸大臣入諸大臣或有咎公者曰公疏言何公故不應令吏部侍郎王鏊詣閣候洛陽語鏊曰事且十成七八諸公第堅持至左順門太監李榮手諸大臣疏曰有 旨諸先生愛君憂國言良是第奴儕事 上久不怒即置之法幸少寬 上自處衆懼莫敢出一語客集面公曰此疏本出公公云何公曰今海內民窮盜起水旱頻仍天變日增文等備員卿佐應所臣救 上始踐阼輒棄萬幾遊宴無

度狎暱群小文等何忍無言榮曰上非不知第
欲寬之耳諸大臣遂旅退釐前謂榮曰設上不
處奈何榮曰榮頸有裏鐵邪敢壞國事是日瑾等
益窘自求去南京安置閣議堅持猶不肯下是夜
瑾等繞上前跪伏哭頭觸地曰微上恩奴儕
且磔餒狗上色動瑾又進曰害奴儕者王岳
上曰何謂曰岳前掌東廠謂言官先生有言第言
議閣時岳又獨是閣議徇馬鷹兎兎岳嘗獻否上
心所明也今獨咎奴儕益復伏地痛哭上怒夜
收王岳等瑾又曰狗馬鷹兎何損萬幾左班官

敢譁無忌者司禮監無人耳有則惟 上所欲爲
誰敢言者 上立詔瑾入司禮監竄岳亨南京途中
賜死遂連斥洛陽餘姚二閣老自是瑾益專弄
權矯詔奪公官二子士聰士奇皆削籍又矯詔逮
公詔獄欲殺公會有投匿名書者事不果坐贖米
先後三千石破公家瑾誅復官致仕 今皇帝即
位群臣交薦加太子太保賜諡存問曰起文彥博
於九表之餘人心攸屬繼韓魏公於百代之後家
慶彌長公清心寡慾凝厚雍粹又奮勵克養識量
益宏居常抑抑至臨大事斧斷霆擊之死不撓卒

贈太傅謚議稱公愚同審子而竟保其身老似武公而不弛於學請謚忠定

太子太保戴恭簡公

公名珊字廷珍浮梁人天順八年進士成化三年御史督學南畿十四年陝西督學爲按察副使窮鄉下邑無不至約束堅明風雨不夷二十年陞浙江按察使尋陞福建兩布政使弘治二年副都御史撫治鄖陽諸府豪右多竄流聚爲利公刺日令自首嚴練兵伍自製爲營陣法蜀盜野王剛越境入竹山平利諸縣守臣畏罪莫敢發公請合湖陝

兵誅其首惡縱脅從千餘人事遂定四年陞刑部
侍郎即訊荆晉兩王府獄明允九年陞南京刑部
尚書十三年改左都御史益自檢飭務持風紀雖
簿書之細必極精覈上親鞫大獄諸司震悚公
從容應對時有開析天威頓霽上知公清慎每
廷宣接膝面咨至移晷刻引疾求退必優詔勉留
命醫賜食間有慰諭若家人父子公不覺泣下
上亦爲動容一日公私懇華容曰珊老病子幼萬
一客死異鄉不瞑目公同年好友受知主上獨
不爲我一言乎一日上召華容議事畢因問珊

病華容言珊久病累疏乞休本出情實乞憐允

上曰渠情卿奏乎對曰珊在告臣往視珊珊恐微誠不能動天聽令臣見 陛下日爲彼達情悃

上曰卿去說與珊朕以天下事推誠付托猶家人父子太平未兆何忍捨朕先歸華容以 上語告公泣曰吾不得返家矣十八年卒於官贈太子太保謚恭簡公德性和粹顧耿耿不苟合而洞達無城府奉職守法不爲物撓而意常近厚祿仕四十餘年家無餘貲辰入酉出窮寒暑不變別歷中外所至有聲績學政尤著

太子少保張簡肅公

公名敷華字公實安南人天順八年進士父洪進士爲御史没于土木公少有奇氣里中有竹樹爲怪公年七歲即指麾群小兒盡斬去入翰林爲庶吉士與華容同出兵部爲主事歷郎中華容醇亮端恪公方毅坦直並負時名成化十一年叅議浙江景寧有礦盜衆且議用兵公力請撫執十二人寘法餘悉解散弘治元年左右布政使湖廣會歲大饑公給粟散粥藥病殍皆高值來商卑詞告糴亟修學宮資其傭直以業餓者得全活甚衆三年副

都御史巡撫山西憂去六年復山西巡撫奏增解池鹽課補藩祿餉大同多折色民困公請太原址可車行者致米八年改陝西會妖僧據山中爲逆朝議且用兵鈞陽曰張都御史能了此不數日公果授計山中父老縛妖僧至明年陞南京刑部侍郎十二年右都御史總漕巡撫江址盡斥武臣諸貪剋者時例漕司負算假銀太倉稍寬其息明年來償償前負又復假前後相尾負益積公曰下剝上攘漕是以窘國貸取息大非政體築高郵湖隄溝殺水勢又築隄寶應十四年改南臺與林瀚林

俊章懋稱南都四君子十八年遷南刑部尚書尋
召還內臺首請嚴禁奔競貪酷者上知公名與
華容鈞陽浮梁同心效職一時並稱名卿正德元
年瑾矯旨逐公歸田又明年卒病且革儼衣冠揖
家廟退終正寢公風采凝重義利介然學問文章
賁飾吏治贈太子少保謚簡肅

論曰近年仕路好附權貴人求翰林科道清要官
權貴人敗亦隨以敗即不敗辱其身廉耻掃地矣
官翰林者多以詞翰相詡不屑言錢穀刑名科道
倚言路持銓曹短長不肯出爲郡守藩臬即出守

郡爲藩臬銓曹必慎秘不洩奏上輒鎖開書奏人
恐洩科道即署故官具疏且指摘銓曹惠安文肅
在刑部忠宣莊簡在兵部歷主事員外郎郎中未
嘗更曹文端理財最節慎曲筭盈縮黠吏不能欺
忠定恭簡出爲參議副使何今昔大異也諸公際
時則旬宣弼亮以濟康熙遇險則正色危言以遏
奸宄卓然以道事君不可則止者矣

皇明名臣記第二十三卷

海鹽鄭曉

尚書劉文安公

公名定之字主靜永新人正統元年進士授翰林
編修四年京城大水詔求直言公上十事畱中進
侍講 景帝登極又言十事乞奪德勝門戰功陞
職以崇廉耻作敵愾陞洗馬尋進右庶子北虜邀
使廷議未決公言宜遣使縻虜我得益修內治天
順元年改通政司叅議兼侍讀成化二年南陽卒
上欲得人入內閣勅王忠肅慎簡擬上柯潛萬安

公葉盛吳節上用公陞太常少卿兼侍讀學士三年進工部侍郎兼翰林學士明年改禮部公在內閣再進密疏皆國家大計公博學能文性尤孝友微時苦家貧授徒資束修爲養旣仕分祿自甘菲惡色溫氣和與物無忤至居官論議據理直言累無沮忌卒贈禮部尚書謚文安

太傅丘文莊公

公名濬字仲深瓊山人景泰五年進士改庶吉士授編修少天資過人孤貧力學爲庶吉士益務博讀群書經史百家箋疏今古文詞至卜筮老釋外

家小說靡不覽觀爲文章不求奇古平易順暢可
讀成化元年爲侍講修英宗實錄或曰于少保
死以不軌盡正其罪公曰已已之變可無譙哉譙
功大過亦不可掩竟錄其實兩廣用兵公上南陽
平寇方略奇公言繳上請付總帥陞侍講學士內
艱服闋還職五年陞翰林學士十三年爲國子祭
酒十六年進禮部右侍郎掌監事公嚴立所道綜
理詳察果諸儒言行事著家禮儀節集朱文公微
言彙爲二十篇倣論語爲朱子學的以通鑑綱目
義重正統秦隋漢唐之交于奪太速稍次其世變

升降治亂大端與國統偏全作世史正綱爲大學
衍義補補真西山衍義治國平天下事附以當世
利害大學衍義補初成適恭陵即位表上覽上
喜命陞公尚書禮部掌詹事府事時年餘七十矣
弘治四年副總裁 憲宗實錄成加太子太保是
年兼文淵閣大學士入內閣上時政疏畧曰成化
間彗星三見徧掃三垣地無慮五六百震邇者彗
見天津地震天鳴無虛日且異鳥三鳴于禁中考
諸經史天變莫大於彗孛在三垣三台尤重地變
莫大於震動在京師邊防爲急知禽鳥動物得氣

之先春秋二百四十二年書彗字者三地震者五
飛禽者二今乃屢見于二十五年之間變不虛
生必有其應天人相與甚可畏也臣願體上天仁
愛念祖宗基業端身以立本清心以應務謹好
尚勿流于異端節財費勿至于耗國公任用勿失
于偏聽禁私謁以肅內政明義理以絕神奸慎儉
德以懷永圖勤政務以弘至治庶可以回天災消
物異帝王之治可幾也疏凡十餘萬言七年陞少
保改尚書戶部大學士武英殿公每以寬大啓上
心忠厚變士習平順正文體經濟覈人材更張立

治體又請訪求遺書 上知公老儒讀書事上輒

允吏部考察外官斥二千人公以爲非唐虞九載

三考之法又非 祖宗制請 上凡歷官未二載

者且復任任雖經一考非貪暴蹤跡顯著者且勿

斥一時不肖者皆喜然自是貪殘吏日肆三原在

吏部持正不肯徇人公不說會劉醫官素出入公

家失職憾誣訐三原衆皆疑劉醫官疏出公意以

故臺諫交劾公公乞老未允八年卒贈太傳謚文

莊公好論議上下千古尤熟 國家典故政事可

否反覆與大臣言官爭是非即未必一一中適然

不肯媼姻取悅商確往事時出意見自高奇矯衆
論能以辯博濟其說人莫能難如論秦檜稱其於
宋有再造功與虜和不爲無見范仲淹生事岳飛
未必能恢復皆怪詭可駭其絕元正統斥許衡不
當仕元又嘗言我朝相業三楊偉矣然當其時南
交叛逆軒龍易位勅使旁午頻泛西洋曾無一語
權歸常侍遠征麓川兵連禍結極於土木之變誰
實啓之皆正論也

太保劉文和公

公名珣字叔溫壽光人正統十三年進士改庶吉

士授編修歷修撰天順初陞右中允七年陞侍講
學士侍東宮東宮即位陞太常少卿兼侍講學士
實錄成進卿仍兼職內艱服除還任成化十年陞
吏部左侍郎兼官如故明年兼翰林學士入內閣
十三年進戶部尚書明年加太子少保兼文淵閣
大學士十八年修續資治通鑑綱目纂文華大訓
成進太子太保謹身殿大學士公鄙薄萬安時對
客罵安負國無耻安積聞恨公百計中傷二十一
年九月致仕去卒贈太保謚文和公美姿容善談
論遇人無矯飾景泰初議迎鑾成化初議 睿皇

后喪禮末年論李孜省左道亂政動搖國本密疏
昌言卒定儲位有大臣之節當是時公與博野同
在內閣人稱公東劉博野北劉林俊嘗曰余以妖
僧孽寺售術貢邪肆興土木不揆狂躁上千宸怒
萬頸俱縮縛下詔獄鬼錄爲伍惟公立爲上解
乃得薄謫崔銑曰公秉心不疑諒直無顧而讒嫉
肆作搆惡於群小假威於邏卒竟去位嘉靖二年
言官疏公孝友早化於鄉閭爲立昭賢祠祀公

太傅謝文正公

公名遷字于喬餘姚人成化十一年進士授修撰

十九年陞右諭德二十三年陞左庶子兼翰林侍
讀弘治四年陞少詹事兼侍讀學士憂去八年與
長沙同入內閣十一年加太子少保兵部尚書兼
東閣大學士十六年加太子太保禮部尚書兼武
英殿大學士十八年加少傅兼太子太傅尚書大
學士如故泰陵大漸入受顧命康陵即位奄瑾專
政公不得其職正德元年乞致仕去瑾指公等爲
奸黨矯上旨榜示天下成化弘治間翰林聲望
最重者吳文定公及公二人皆進士第一人儀幹
修整文定溫粹含弘公明暢亮直文定詩文尤有

古意一時並負公輔之望丘文莊卒文定適憂去
公入內閣十餘年間號能持正不失爲賢相文定
竟不得入內閣洛陽爲首相公數言文定洛陽曰
吾且去用之未晚他日又言又曰我且去用之未
晚公曰吾豈私原博耶顧渠科第先予年齒先予
望實先予予越次在此慚焉故言之而公終不聽
耶洛陽笑不答正德初天變輔臣皆上章自劾公
求去不得復上疏薦文定及王文恪自代公初入
內閣宜與洛陽相繼爲首相當是時長沙位在公
上凡條答敷奏章疏皆出長沙公與洛陽並勒致

仕長沙爲首相文恪以時望所屬焦芳欲援以爲
重告瑾內閣宜南北各用一人以故芳與文恪同
入內閣嘉靖初遣使存問公謝疏曰臣匪才誤蒙
孝宗知遇顧託之重欲圖報稱不自知其力之不
足旣而格心無術輔導不效引身退避杜門省愆
俯仰懷慚罪責難追分與草木同腐幸溝壑未填
遇 皇帝聖明嗣承天統一新萬化疲困更生如
臣衰朽特軫聖慈不加負國之誅重錫優老之典
寵命下及慚懼交并顧茲垂暮之年諒無圖報之
日惟有一言獻納庶幾少效涓埃臣聞傳說告高

宗曰學于古訓乃有獲又曰監于先生成憲其永
無愆古訓者二帝三王之典謨訓誥及諸經史之
所載者是已成憲者 聖祖神宗之典章法度凡
今諸司之所職者是已仰惟聖性睿哲生知而聖
德成就必資問學經筵儒臣分直進講所以薰陶
涵養者在是燕閒之時尤宜博覽群籍以廣見聞
苟有疑義難明即召勸講之臣同賜質問務求通
解戒一暴十寒之失積日就月將之功則聖學緝
熙追縱古昔帝王之盛近代不足言矣我朝 祖
宗之法斟酌古今之宜諸司而能恪守萬世可以

常行奈何世遠人下政久弊積漸失其初者有矣
聽覽之際宜申飭百司講求成憲苟有空礙難行
即召執事之臣面加商確務合舊制究詰舛訛之
端振革廢弛之弊則聖政有恒而聖治之成可以
紹休祖宗垂裕無疆矣夫一日萬幾固未易縷陳
而一心萬化惟在於知要臣故特舉君道之至要
以裨聰明之萬一其他軍民利病政治缺失陛下
明詔許諸人直言無隱况以言爲職者林立于廷
必能爲陛下次第陳之惟望留神省覽兼聽廣納
不以踈淺而或遺不以拂逆而見拒則宗社幸甚

生靈幸甚嘉靖六年春復召入內閣尋進戶部尚書大學士如故明年三月乞歸十一年卒年八十贈太傅謚文正

太傅王文恪公

公名鏊字濟之吳人成化十一年進士公幼穎悟不凡十六隨父讀書太學太學諸生爭傳誦其文侍郎葉盛提學御史陳選嘗奇公天下士初授翰林編修閉門力學避遠權勢弘治初滿九載陞侍講實錄成陞右諭德八年薦陞侍講學士兼日講公學問博有識鑒爲文審密爾雅議論宏暢試

士南宮專尚經術險麗奇袤者一切屏去弘治間
文體一變士習稍端公有力焉東官將出閣大臣
請選正人端國本首薦公九年兼諭德十一年陞
少詹事兼侍講學士十三年陞吏部右侍郎時鈞
陽代金陵爲尚書洪洞及公爲侍郎會虜火節入
寇公上籌邊八事一定算二重主將三嚴法令四
恤邊民五廣召募六用間七分兵八出奇遂薦秦
紘起陝西總制又請科貢之外略訪前代制科如
博學宏詞之類以收異才六年一舉舉不過十餘
人其翹然出類者儲之翰林餘補科道部屬中書

先有官者重材加秩數年之後士類濯磨必以通經學古爲高而脫去諛聞之陋矣其選將才亦然十六年憂去正德元年復除侍郎兼學士會災異謝公求退薦公自代當是時八奄導上遊狎中外洵洵臺諫交論不聽洪洞時爲戶部尚書與諸大臣伏闕請誅八奄召諸大臣至左順門中官傳諭甚厲衆相視莫敢發言公對曰八人者不去亂本不除竟不能去八奄遂分布要路瑾入司禮監首逐洪洞繼逐劉謝欲引吏部尚書焦芳入內閣廷議推公瑾恨公迫公論不得已公遂與芳同入

內閣進戶部尚書文淵閣大學士逾年加少傅改
武英殿上時政四事曰講學曰延下曰用人曰節
用時瑾方威鉗士類按索微瑕輒枷械死公謂瑾
曰士大夫可殺不可辱歷而殺之吾尚何顏於此
瑾恨洪洞不已必欲置死地又欲以他事中劉謝
公前後力救得免瑾又欲殺華容逮詔獄坐激變
土官罪死公曰土官未叛何名爲激變或惡楊文
襄於瑾謂築邊大費瑾又欲罪之公曰楊總制高
才偉略爲國修邊豈可以功罪初瑾見公開誠與
言亦強聽公言芳專事姘阿瑾驕倖日甚公無可

奈何居常戚戚四年夏力求去瑾每念公相忤又
輒發怒欲中傷公公惴惴杜門瑾敗得免嘗自贊
曰噫嘻先生何如其人窮年校書結髮勵行白首
於道茫然無聞者乎爵厠公孤官居臺閣志懷輸
忠幾昧納約者乎貴戚赫炎不能附麗權璫狂制
不能媵阿一有違言超然不辱者乎遇事直前不
知顧忌見利思義不知規避歸卧空山晏然寤寐
者乎斯人也其量則隘其才則庸無裨于世自潔
其躬跡其所至蓋知慕首陽之節而不知柱下之
工知希止足之疏而不能爲應變之崇者乎居閑

十餘年論薦文章嘉靖初遣行人存問曰朕行且
召卿公䟽謝乞上講學親政講學篇曰國家經筵
之設盛矣經筵一開天下欣欣焉傳之以爲希濶
之典其間寒暑皆輟春秋之月月不過三日三日
之期風雨則免政事有妨則免講之日夙具講章
至期講訖綸音賜宴儼然而退上下之情未見其
親且密也至於日講可謂親矣然體分過嚴上有
疑焉未嘗問也下有見焉未嘗獻也昔高宗學于
古訓遜志時敏成王訪學于群臣曰學有緝熙於
光明商周之君好學如此六人主一日萬幾固不

譬如儒生學士日夜孜孜然而帝王精一之傳治天下之大經大法古今治亂之迹天人精微之際自非遜敏緝熙亦安望其有得今乃闊略如是暴之之日少寒之之日多傳之之人寡咻之之人衆未見其能得也且不獨高宗成王爲然也漢光武雖在軍中投戈講藝息馬論道至夜分乃罷唐太宗延四方文學之士房杜褚薛輩十八人分番直宿討論經籍或至夜分今貞觀政要與魏徵所論亦可見矣宋世賢主宮中消日惟是觀書居常禁中亦有日課翰林侍從日寓直禁中以脩顧問我

太祖甫得天下開禮賓館與宋濂劉基章溢輩日
相講論其後聖學高明詔誥天下皆出御制睿翰
如飛群臣拱視今御製文集是也 仁宗臨御建
弘文閣於思善門之右文學之臣數人入直時至
館中講論 孝宗經筵之外每觀永樂大典又嘗
索太極圖西銘諸書於宮中玩之尤嗜故學士沈
度之書日臨數過夫古帝王之學如此 祖宗之
學如此陛下睿哲自天春秋鼎盛講明聖學正其
時也臣愚特望於便殿之側復弘文閣故事妙選
天下文學行藝著聞者七八人更番入直內閣大

臣一人領之如先朝楊溥故事陛下萬幾有暇時
造館中屏去法從特齊天威從容訪問或講經或
讀史傳或論古今成敗或論民間疾苦間則遊戲
翰墨雖詩文之類亦惟所好蓋亦日講之義而加
親焉大畧如家人父子上有疑則必問下有見則
必陳日改月化有不知其然而然者時御經筵所
以昭國家之盛典日造弘文所以崇聖學之實功
如是不已則聖德日新又新高宗成王不得專美
於前矣親政篇曰易之泰曰上下交而其志同否
曰上下不交而天下無邦交則泰不交則否自古

皆然而不交之弊未有如近世之甚者君臣相見止於視朝數刻上下之間章奏批答相關接刑名法度相維持而已非獨沿襲故事亦其地勢使然何也國家常朝於奉天門未嘗一日廢可謂勤矣然堂陛懸絕威儀赫奕御史糾儀鴻臚舉不如法通政司引奏上特是之謝恩見辭惴惴而退上何嘗問一事下何嘗進一言哉臣愚以爲欲上下之交莫若復古內朝之法蓋周之時有三朝庫門之外爲外朝詢大事在焉路門之外爲治朝日視朝在焉路門之內曰內朝亦曰燕朝玉藻曰君視

朝退適路寢聽政蓋視朝而見群臣所以正上下之分聽政而適路寢所以通遠近之情漢制大司馬左右前後將軍侍中散騎常侍散騎諸吏爲中朝丞相以下至六百石爲外朝唐皇城之北南三門曰承天元正冬至受萬國之朝貢則御焉蓋古之外朝也其北曰太極門其內曰太極殿朔望則坐而視朝蓋古之正朝也又北曰兩儀門其內曰兩儀殿常日聽朝而視事蓋古之內朝也宋時常朝則文德殿五只一起居則垂拱殿正旦冬至聖節稱賀則大慶殿賜宴則紫宸殿或集英殿試進

士則崇政殿侍從以下五日一人上殿謂之輪對
則必述時政利害內殿引見亦或賜坐或免穿靴
亦三朝之遺意焉蓋天有三垣天子象之正朝象
大微也外朝象天市也內朝象紫微也國朝聖節
正旦冬至大朝會則奉天殿即古之正朝也常朝
則奉天門即古之外朝也而內朝獨缺然非缺也
華蓋謹身武英等殿豈非內朝之遺制乎洪武中
如宋濂劉基永樂以來如楊士奇楊榮輩日侍左
右蹇義夏原吉輩常奏對便殿于斯時也豈有壅
隔之患哉今內朝罕復臨御常朝之後人臣無復

進見三殿高閼鮮或窺焉故上下之情壅而不通
天下之弊由是而積 孝宗晚年深慨於斯屢召
大臣於便殿議論政事將大有爲而民之無祿不
及覩至治之美天下至今爲恨惟陛下遠法 聖
祖近法 孝宗盡剷近世壅隔之弊常朝之外即
文華武英倣古內朝之意大臣三日或五日一起
居侍從臺諫各一人上殿輪對諸司請事上據所
見決之有難決者與大臣面議之不時引見群臣
凡謝恩辭見之類皆得上殿陳奏虛心而問之和
顏色而道之如此人人得以自盡陛下雖深居九

重而天下之事燦然畢陳于前唐虞之世明目達聰嘉言罔伏野無遺賢亦不過是而已大禮議起連逐輔臣士類咸頽起公未及起病卒年七十五巡撫吳廷舉上言整高文清節守道見義洞庭雲卧望重東山震澤波澄名高北海乞與褒卹贈太傅謚文恪

太保劉文肅公

公名忠字司直陳畱人成化十四年進士庶吉士授編修陞侍講再陞侍讀學士公修勵行檢時國家無事翰林程李輩有文學詞藝行交遊有聲譽

公獨卷歛沉默正德二年陞南京禮部侍郎尋進
尚書明年改南京吏部公性峻行方寡合一介不
苟得惡士人競趨自處常過抗貴人亦力抑之以
故久在南京南京名吏隱多俛仰瓦合公獨毅然
持規撫奪越閩黠吏竄名籍詭冒者千人焦芳顧
知公薦公賢五年正月瑾傳旨召入翰林比至相
見又不喜業已召改吏部尚書兼翰林學士掌詹
事府事管誥勅是年瑾誅始入內閣是時張永幸
用事大臣事永復如瑾公益持重永遣其黨廖鵬
來謁公不加禮如僕又却其餽永大不說公在閣

不滿三月乞致仕不許累遷少傅兼太子太傅吏部尚書謹身殿大學士公輒進儻言貴倖益不悅正德六年公累疏辭疾未允強起考禮部貢士出院即乞省墓上忽召長沙至煖閣摘錄中語言欲罪公長沙爲公力解公即日陞辭去歸田杜門公在內閣未久以故無大建明然重厚持正嘉靖初遣使存問卒贈太保謚文肅崔文敏曰余爲編修時見公云言古羈人匹士雖當流離困絕不取非義財况祿食者乎許襄毅嘗論當世人物獨推章公懋雍公太語銑子初仕慎事大夫翰林惟司

直一人耳

少保石文隱公

公名瑤字邦彥棗城人成化二十三年進士庶吉
士授檢討正德元年爲南院侍讀學士四年南國
子祭酒公靖方介恪潔已好修士類信嚮五年召
國子祭酒時浮逐兢進公獨鯁狷有名八年爲南
吏部侍郎十年召入禮部十六年進尚書掌詹事
府嘉靖初代王瓊吏部尚書吏部黷亂者數年公
以孤貞行一意柄臣不悅閏兩月解吏部以尚書
兼學士仍掌詹事府事嘉靖三年五月大禮議起

諸大臣相繼去兼文淵閣大學士入內閣五年六月加少保兼太子太保大學士武英殿尚書如故時時召對平臺煖閣議廟樂再議廟衛又議章聖太后 皇后謁 世廟儀守正義力爭 上謂公非通儒公又三封內批言 太后 皇后出入正朝陰強陽弱之兆忤旨六年二月致仕卒謚文隱公清修無玷毀譽不撓持論堅確不避夷險秉正嫉邪進禮退義兄玠同舉進士累官戶部尚書論曰文安無大建明亦無大過文莊博覽今古編通儒其所著書多附正義羽翼經史文和處文康

文穆間道不同時時相詆文康去文和又爲文穆
所擠文正文恪之遇逆瑾退進殊途歸潔其身文
肅去時逆瑾已誅長沙爲政竟不知其讒間所起
文隱秉銓清勁不說於新都數議大禮乃不肯負
新都也文隱去後而吁咈之風微矣

皇明名臣記第二十三卷終

子履準校正